



Unë i kam shpallur luftë atij që armiqëson një mik Timin. Gjërat më të dashura tek Unë, e me të cilat më afrohet robi janë ato që ia kam obliguar

Ebu Hurejra (Allahu qoftë i kënaqur me të!) transmeton se i Dërguari i Allahut ﷺ ka thënë: "Unë i kam shpallur luftë atij që armiqëson një mik Timin. Gjërat më të dashura tek Unë, e me të cilat më afrohet robi janë ato që ia kam obliguar. Ai vazhdon të më afrohet me vepra vullnetare derisa ta dua, e, kur ta dua, i bëhem dëgjimi me të cilin dëgjon, shikimi me të cilin sheh, dora me të cilën prek dhe këmba me të cilën ecën.

Nëse më kërkon diçka, ia jap dhe, nëse më kërkon mbrojtje, e mbroj."

[Sahih] [Transmeton Buhariu]

Profeti ﷺ ka treguar në hadithin kudsij se Allahu i Lartësuar ka thënë: "Atij që e lëndon një mik Timin, e zemëron dhe e urren, ia kam bërë të ditur dhe ia kam shpallur armiqësinë Time." Miku i Allahut (velij) është besimtari i devotshëm. Sipas shkallës së imanit dhe devotshmërisë që ka robi, është edhe hisja e tij nga miqësia e Allahut. Muslimani nuk i afrohet Zotit të tij me asgjë më të dashur për Të sesa me atë që Ai ia ka bërë obligim: kryerjen e adhurimeve dhe lënien e haramëve. Pastaj, muslimani vazhdon t'i afrohet Zotit të tij me veprat vullnetare, bashkë me obligimet, derisa të fitojë dashurinë e Allahut. Kur Allahu e do robin e Tij, Ai e udhëzon dhe e drejton kah e mbara në këto katër gjymtyrë: I drejton dëgjimin kah e mbara e ai dëgjon vetëm ato fjalë që kënaqin Allahun. I drejton shikimin kah e mbara e ai sheh vetëm atë që Allahu do dhe pëlqen të shihet. I drejton dorën kha e mbara e ai bën me dorën e tij vetëm atë që i pëlqen Allahut. I drejton këmbën kah e mbara e ai shkon vetëm atje ku i pëlqen Allahut dhe vetëm te punët e mira. Veç kësaj, nëse Ai i kërkon diçka Allahut, Ai ia jep atë atij. Kështu, ai bëhet njeri që i pranohet lutja. E nëse kërkon mbrojtjen e Allahut, Ai e mbron atë nga gjërat që i frikësohet.

<https://sunnah.global/hadeeth/sq/show/66534>

